



19.10.2021

UKA2021/146/147

Inatsisartut aaliangiiffigisassaattut siunnersuut Naalackersuisut peqquneqassasut Naalagaaffimmi oqartussaasunut saaffigineqqullugit qulakkeerniarlugu, Kalaallit Nunaata killilersorneqanngitsumik Istanbulimi isumaqatigiissummut ilanngunnissaa. Tamanna pissaaq UPA2022 pisinnagu.

(Inatsisartunut ilaasorta, Anna Wangenheim, Demokraatit)

Inatsisartut aaliangiiffigisassaattut siunnersuut Naalackersuisut peqquneqassasut aningaasanik immikkoortitsinissaannik persuttaanerup minnerunngitsumillu angerlarsimaffimmi persuttaanerup akiorniarnissaa ersarissumik anguniarlugu, inuiaqatigiinni 2025-mi persuttaanerit amerlassusaat ullumikkumut sanilliullugit 25 procentimik apparsimassasut. Paasisitsiniaaneq kingusinnerpaamik 1. august 2022 aallartinneqassaaq 31. december 2024-ip tungaanut ingerlanneqassalluni.

(Inatsisartunut ilaasorta, Anna Wangenheim)

Inatsisartunut ilaasortap Anna Wangenheim-ip siunnersuutaanut marlunnut ataatsimoortinneqarsimasunut Siumumiik imatut oqaaseqassuugut.

146-mut;

Istanbulimi Europarådip isumaqatigiissutaanni salliutillugu pineqartoq unaavoq, arnat angutillu – soorunami – naligiissinneqarlutik inissisimanerisa nukittorsarneqarnissaa, taannalu aqqutigalugu arnanut persuttaasernerit annikillisinneqassasut. Isumaqatigiissummittaaq naqissuserneqarpoq, arnanut persuttaasarneq – allatigulluunniit arnanut annikinnerulersitsisarneq – qangarsuaaniilli inuiassuit oqaluttuarisaaneritut ilanngulluni tungassuteqartoq, taamalu inuiassuit arnanut isiginnittariaaseqartarsimanerat – aammalumi isiginnittariaaseqarnerat – arnat siuariartornissaanut akornutitut inisittartoq.

Taamaattumik Istanbulimi isumaqatigiissut tamakkiisumik Siumumit isumaqatigaarput, aamma siunertaanut suleqataanissarput piareersimaffigaarput.

Siumumiillu tapersorsorparput isumaqatigiissutip imai uagut inuiaqatigiitsinni paasisutissiissutigineqassasut, taannalu paasisutissiineq naalackersuinikkut iliuusissanik ilaqartinneqassasoq. Soorlu arnat naligiissitaanerat inuiaqatigiinni ulluinnarsiutigalugu atulissagipput, tamatta paasisimallugu naligiinnginneq uatsinni ilanngulluni aallaaveqarmat.

Taamaattumik paasisitsiniaaginnarneq siunertarissallugu naammannaviangilaq. Aamma inuiaqatigiinni aqqissuussisimanerput ilanngullugu eqqumaffigeqqissaassagipput pisariaqassaaq; arnat angutillu ilumut naligiittut inissisimanerat – pissusissamisoortoq – siuarsassagutsigu.

Siunnersuuteqartup UPA 2022 pisinnagu Istanbulimi isumaqatigiissummut ilanngutereersimassasugut siunnersuutigivaa. Tamanna tungaviatigut ajorinngilarput, taamaattorli Istanbulimi isumaqatigiissutip soppassuarnik imaqarnera angisoorujussuartut



isigigatsigu Naalakkersuisut allannguutissatut siunnersuutaat paasilluarlugu taperserparput. Tassalu ilaasortanngorsinnaanissaq siunertarlugu UPA 2022-mi siunnersuummik saqqummiussinissaq siunertarlugu peqqusisoqassasoq. Taannalu ataatsimiititaliami susassaqartumi suliarineqarnissaa innersuullutigu.

147-mut.

“Persuttaaneq inuiaqatigiinni ajornartorsiutaavoq qaffakkaluttuinnartoq” Siunnersuuteqartup tunngavilersuutigisamini siulliullugu allataa ilumoorluinnarpoq.

Politiit nalunaarusiaat takugaanni ukioq 2020-mi nakuusernertut tunngatillugu nalunaaruteqarnerit 1394-nik amerlassuseqarput. Aggvaqatigiisillugu ullormut sisamapajaanik amerlassuseqarput. Ullut tamaasa! Immaqa aali nalunaarutigineqartanngittorpassuaqartoq.

Taamaattoqarnera sorpassuarnut sunniuteqartarpoq. Ilaqutariit avissaartariaqartarnerannik kinguneqartarpoq, meeqqat angerlarsimaffiup avataanut inissinneqartarnerannik kinguneqartarpoq, annernarnerpaamillu attorneqartartut tassaasarput meeqqat.

Assigiinngittorpassuartigut paasititsiniaanerit ingerlagaluartut aammalu Kommuunit pitsaaluinermik annertuumik suliaqaraluartut kisitsisit takutinneqartut ajoraluartumik pitsaasup tungaanut takussutissiinngillat.

Tassami 2019 – mi nakuusernertut nalunaarutiginninnerit 2020-mi 500-t tungaanut amerleriarput. Taamaammatt Naalakkersuisut allannguutissatut siunnersuutaat eqqarsarnartoqartillugu oqarusuppugut. Allannguutissatummi siunnersuut pitsaaliuineramik ukkassinissaq ukiuni tulluittuni tallimani nakuusernertut apparsaanissaq siunertarerusunneqarmat.

Siunnersuuteqartulli kisitsisitalersuilluni ukiunut tulluittunut kisitsisitaliilluni paasititsiniaanermik ingerlatsisoqalernissaa tutsuiginartutut isigalugu taperserparput. Taanna anguniagassinneruinnarani pisussaaffilerlunili sammisap ilungersunartutut isigalugu samminissaanik siunertaqarmat.

Taamatut oqaaseqarluta siunnersuut ilalerlugu ataatsimiititaliami aappassaanerineqartigani suliarineqarnissaa innersuupparput.

Jess Svane

SIUMUT